



20. august 2021

UKA 2021/69

Inatsisartut suleriaasianni § 33 tunggavigalugu matumuuna aalajangiiffigisassatut siunnersuuteqarpunga:

Inatsisartunut aalajangiiffigisassatut siunnersuut Naalakkersuisut peqquneqassasut siunnersuuteqaqqullugit eqqussukkanut akitsuutit pillugit inatsisartut inatsisaat nr. 19 30. oktober 1992-imeersup allanngortinneqarnissaanik, taamaasillutik neqinut akitsuutit eqqartorneqartoq § 1, nr. 13-17 atorunnaarsillugu

(Inatsisartunut ilaasortaq Jens-Frederik Nielsen, Demokraatit)

Tunggavilersuut

Tamatta katersuulluta mamartunik nereqatigiinneq nuannarisuuarput. Nalliuttorsionnernessinnaavoq, aammali akuttunngitsumik qaniginerpaasagut peqatigalugit unnukkorsionnerna.

Nerinerit taakku siunissami akikinnerujussuanngorsinnaapput, Inatsisartut siunnersuut una akuerissappassuk. Assersuusiulaarlanga:

1. Spaghetti neqimik miseralik unnukkorsiorsiutigaarput. Tassunga nersussuup neqaa aserortigaq 1 kilo atugassaavoq. Neqinut akitsuut piissagaluarutsigu, ullumikkumut naleqqiullugu 10 koruunimik akikinnerulissaaq.

2. Tallimangornerup unnukkorivaa, savamillu grillikkamut ikinngutitit neriartoqqusimavatit. Ajoraluartumik silarsuarmi tamarmi mamarnerpaamik kalaallit savaanik pissarsisinnaasimangilatit, savamilli New Zealandimeersumik 2 kilomik pisisariaqarsimallutit. Tassani ullumikkumut naleqqiullugu 50 koruunimik akikinnerulissaaq.

Allatut oqaatigalugu ataasiakkaanut sipaartoqarsinnaalluarpoq, neqinut akitsuut peeraluarutsigu.

Demokraatit isumaqarput, maani nunami inuuniarneq akikinnerulertariaqartoq. Qulakkeertariaqarparput, kalaallit tamarmik annertunerusumik aningaasaateqarnissaat. Ilaatigut tamanna pisinnaavoq akitsuutinik appaanikkut. Una neqit akitsuutaannik atorunnaarsitsinissamik siunnersut taamaattumik isiginiarneqassaaq matumani katersuunnermi akitsuutinik appaanissamik siunnersuutinut ataqatigiissumik.

Demokraatit aallaavittut isumaqarput, pingaartuusoq, siunnersuuteqartutut siunnersuutit aningaasalersorneqarnissaannik siunnersuuteqarnissaq. Erseqqissarneqassaarlu, taamatuttaaq allatut aningaasalersornissaannut siunnersuutinut ammagatta. Siunnersuutip aningaasalersornissaanut siunneruutigaarput aningaasanut inatsimmi ingerlatsinermut- ilassutitullu tapiissutinut sipaarniarnikkut aningaasalersorneqassasoq. Taamaaliorneq ukiumut 56 millioner koruunimik aningaasartuutikinnerunermik kinguneqassaaq.¹ Aningaasalersornissaanut siunnersuutip uuma aningaasalersornissaanut siunnersuut tamakkiisumik siunnersuutit ilaattut isigineqassaaq aammalu uani katersuunnermi akileraarutinut- aamma akitsuutinut appaanissanik Demokraatit siunnersuutaasa ilaattut.

¹ https://ina.gl/documents/para3637/2021/svar/038_2021_skatter_afgifter_JFNI_akissut.pdf



Demokraatit siunnersuummut Naalakkersuisut maanilu Inatsisartuni partiit amerlanerussuteqartut tapersiinissaat neriutigaat.

Pisortanut aningaasatigut allaffissornikkullu kingunissai

Neqit eqqussuunneqarnerannut akileraarummit iluanaarut 2020-imi nunatta karsianut 18.541.000

koruuniusimasoq. Pisortanut allaffissornikkut kinguneqassanngilaq.²

Namminersorlutik inuussutissarsiteqartunut aningaasatigut allaffissornikkullu kingunissai

Suliffeqarfiit soorlu assersuutigalugu nerisassaarniat, neqinik nioqquteqartut akimik appaasinnaangussapput. Suliffeqarfiit kantiinallit assigisaannilluunniit neqinik pisiniarnerminni sipaagaqartalissapput. Neriniartarfiit kaffisorniartarfiillu, neqisiniarnerminni sipaagaqarsinnaalissallutik.

Ullumikkut imaappoq, nersutit timai iluitsut affakkaalluunniit nassulinneersut puulukiniillu nujuartaanngitsuneersut § 3 a malillugu akileraaruserneqartanngillat, suliffeqarfinnit neqinik agguisinnaanerminnik akuerisaagunik, tuniniaaqqissinnaaneq siunertaralugu. Taamaattumik imaaleriaannaavoq, soorlu assersuutigalugu toqoraavinni sulisut ikilisinnaanerat.

Nunatsinni savaanik tunisassiornermut tunngatillugu, imaaleriaannaavoq, atuisut annertunerusumik kalaallit savaanniit nunanit allanit tikisitanik savat neqaanik toqqaasalersut. Tamannali Demokraatit ilimagivallaanngilaat, nunatsinni savaatigut pitsaaneroqimmata.

Innuttaasunut aningaasatigut allaffissornikkullu kingunissai

Innuttaasut, neqitortartut, neqisiniarnerminni sipaaruteqarsinnaalissapput taamaattumillu qaammatit tamaasa aningaasaateqarnerulerlutik. Taamatuttaaq naatsorsuutigineqarsinnaavoq, kaffisorniartarfimmi imaluunniit neriniartarfimmi neqitalinnik nerinermi akit appassasut.

² https://ina.gl/documents/para3637/2021/svar/038_2021_skatter_afgifter_JFNI_akissut.pdf